

## 52-bob. Dastlabki qarorlar

### 370-modda. Tovarlarni tasniflash bo'yicha dastlabki qarorni qabul qilish

Bojxona organlari tovarlarning tasniflanishiga nisbatan O'zbekiston Respublikasi Tashqi iqtisodiy faoliyatining tovar nomenklaturasiga muvofiq tovar bojxona organiga taqdim etilgunga qadar dastlabki qaror qabul qilishi mumkin.

Dastlabki qaror bojxona organlari uchun majburiydir.

Tovarlarni tasniflash bo'yicha dastlabki qarorning shakli O'zbekiston Respublikasi Davlat bojxona qo'mitasi tomonidan belgilanadi.

### 371-modda. Tovarlarni tasniflash bo'yicha dastlabki qaror qabul qilish to'g'risida so'rov

Tovarlarni tasniflash bo'yicha dastlabki qaror qabul qilish to'g'risidagi so'rovda (bundan buyon matnda so'rov deb yuritiladi) tovarlarning to'liq tijorat nomi, firma nomi, asosiy texnik, tijorat tavsiflari va tovarni bir ma'noda tasniflash imkonini beruvchi boshqa ma'lumotlar ko'rsatilgan bo'lishi kerak. Zarur hollarda, mahsulotning fotosuratlari, rasmlari, chizmalari, pasportlari hamda ushbu dastlabki qarorni qabul qilish uchun zarur bo'lgan boshqa ma'lumotlar va hujjatlar taqdim etiladi.

Yuridik shaxsdan kelib tushadigan so'rov tashkilot rahbari tomonidan familiyasi, ismi, otasining ismi va lavozimi ko'rsatilgan holda imzolangan hamda tashkilot joylashgan yer to'g'risidagi ma'lumotlarni o'z ichiga olgan bo'lishi kerak.

Jismoniy shaxsdan kelib tushadigan so'rov ushbu shaxs tomonidan imzolangan va uning yashash manzili haqidagi ma'lumotlarni o'z ichiga olgan bo'lishi kerak.

So'rov bojxona organiga kelib tushgan kundan e'tiboran yigirma kun ichida ko'rib chiqiladi.

Arizachi tomonidan ma'lumotlar, hujjatlar va materiallar tovarlarni tasniflash bo'yicha dastlabki qaror qabul qilish uchun to'liq bo'lmagan hajmda taqdim etilgan taqdirda, bojxona organi dastlabki qarorni qabul qilish to'g'risida bojxona organiga ariza berilgan kundan e'tiboran yigirma kalendar kun ichida qo'shimcha ma'lumotlarni, hujjatlarni va materiallarni berish zarurligi to'g'risida arizachini xabardor qiladi. Bunda aynan qanday qo'shimcha ma'lumotlar, hujjatlar va materiallarni taqdim etish zarurligi ko'rsatilishi shart.

Qo'shimcha ma'lumotlar, hujjatlar va materiallar arizachi xabardor qilingan kundan e'tiboran oltmish kalendar kun ichida taqdim etilishi lozim. Agar ma'lumotlar, hujjatlar va materiallar belgilangan muddatda taqdim etilmagan bo'lsa, tovarlarni tasniflash bo'yicha dastlabki qaror qabul qilish to'g'risidagi ariza ko'rib chiqmasdan qoldiriladi.

O'zbekiston Respublikasi Tashqi iqtisodiy faoliyatining tovar nomenklaturasi bo'yicha tovarning kodini aniqlash borasida nizoli vaziyatlar yuzaga kelgan hollarda va ularni hal etish qiyin bo'lganda, bojxona organi tovarlarning namunalarini yoki nusxalarini hamda tegishli hujjatlarni Umumjahon bojxona tashkilotiga tegishli tekshirishlar yoki sinovlar o'tkazish uchun yuborishi mumkin. Bunda tovarlarni tasniflash bo'yicha dastlabki qaror bojxona organi tomonidan o'z so'roviga javob olinganidan keyin qabul qilinadi.

Bojxona organi tegishli qaror qabul qilingan kundan e'tiboran uch ish kuni ichida arizachini tovarlarni tasniflash bo'yicha dastlabki qaror qabul qilinganligi to'g'risida xabardor qilishi kerak.

So'rovning rad etilishi uni rad etish uchun asos bo'lib xizmat qilgan sabablar bartaraf etilgan taqdirda arizachining dastlabki qarorni qabul qilish to'g'risida qayta murojaat etishiga to'sqinlik qilmaydi.

### 372-modda. Tovarlar tasniflash bo'yicha dastlabki qarorning amal qilish muddati

Tovarlar tasniflash bo'yicha dastlabki qaror, agar u o'zgartirilgan, qaytarib olingan yoki bekor qilingan bo'lmasa, qabul qilingan kundan e'tiboran bir yil ichida amal qiladi. Ushbu muddat tugagach, dastlabki qaror o'z kuchini yo'qotadi, bu manfaatdor shaxsning yangi dastlabki qaror berish to'g'risidagi so'rov bilan murojaat etishiga to'sqinlik qilmaydi.

### 373-modda. Tovarlar tasniflash bo'yicha dastlabki qarorni o'zgartirish, qaytarib olish yoki bekor qilish

Bojxona organlari tovarlar tasniflash bo'yicha dastlabki qarorni o'zgartirish, qaytarib olish yoki bekor qilish to'g'risida qaror qabul qilishi mumkin.

Tovarlar tasniflash bo'yicha dastlabki qarorni o'zgartirish quyidagi hollarda amalga oshiriladi:

O'zbekiston Respublikasi Tashqi iqtisodiy faoliyatining tovar nomenklaturasi o'zgartirilganda;

dastlabki qarorni qabul qilishda yo'l qo'yilgan kamchiliklar va xatolar aniqlanganda.

Tovarlar tasniflash bo'yicha dastlabki qarorning o'zgarishi shu qarorda ko'rsatilgan muddatda kuchga kiradi.

Tovarlar tasniflash bo'yicha dastlabki qarorning shartlariga amal qilinmagan taqdirda u qaytarib olinadi.

Tovarlarni tasniflash bo'yicha dastlabki qarorni qaytarib olish to'g'risidagi qaror tovarlarni tasniflash bo'yicha dastlabki qarorning o'zgarishi e'lon qilinganidan keyin uch ish kunidan kechiktirmay qabul qilinishi kerak va bir vaqtda kuchga kiradi.

Agar tovarlarni tasniflash bo'yicha dastlabki qaror arizachi tomonidan taqdim etilgan to'liq bo'lmagan yoki noto'g'ri ma'lumotlar asosida qabul qilingan bo'lsa, bunday qaror bekor qilinadi.

Tovarlarni tasniflash bo'yicha dastlabki qarorni bekor qilish to'g'risidagi qaror dastlabki qaror qabul qilingan kundan e'tiboran kuchga kiradi.

Tovarlarni tasniflash bo'yicha dastlabki qarorni o'zgartirish, qaytarib olish yoki bekor qilish to'g'risidagi qaror dastlabki qaror berilgan shaxsga qaror qabul qilingan kundan keyingi ish kunidan kechiktirmay yozma shaklda yuboriladi.

### 374-modda. Dastlabki qarorlarning oshkoraligi. Tovarlarni tasniflash bo'yicha berilgan dastlabki qarorlarning reyestrini yuritish

Tovarlarni tasniflash bo'yicha dastlabki qarorlar ochiq axborot bo'lib, barcha yuridik va jismoniy shaxslarga ularning yozma so'rovlariga ko'ra hech bir cheklovlarsiz taqdim etilishi kerak, bundan tijorat siri yoki qonun bilan qo'riqlanadigan boshqa sir bo'lgan axborot mustasno.

O'zbekiston Respublikasi Davlat bojxona qo'mitasi Tovarlarni tasniflash bo'yicha berilgan dastlabki qarorlarning reyestrini yuritadi va uning davriy ravishda e'lon qilinishini ta'minlaydi.

